

Berlusconiren gobernuaren  desegitea

Akabo Berlusconiren Gobernua

Scalfaro kontsultetan hasiko da gaur krisi politikoari zer irtenbide eman erabakitzeko

Silvio Berlusconi Italiako lehen ministroak dimisioa aurkeztu zion atzo Oscar Luigi Scalfaro Italiako lehendakariari. Honek onartu zuen Berlusconiren dimisioa, baina «erreserbarekin». Gauzak horrela, Scalfaroren esku geratu da Italiako krisi politikoari zer irtenbide eman erabakitzea.

I. BASTERRETXEA / DONOSTIA

«Berlusconik laster dimitituko du» esaldia behin baino gehiagotan entzun eta irakurri dugu aspaldi honetan. Hainbeste bider entzun ostean, Berlusconiren ahotik «dimisio» hitza noiz entzungo zain izan dira munduan asko eta asko. Baina atzo arte, abenduaren 22ra arte. Izan ere, atzo aurkeztu zion Silvio Berlusconi Italiako lehen ministroak dimisioa Oscar Luigi Scalfaro Italiako lehendakariari.

Scalfarok onartu zuen Berlusconiren dimisioa, baina «erreserbarekin». Formula protokolaria da «erreserba». Formula horren bidez, egungo Gobernuak indarrean jarraitzen du beste bat osatu bitartean, krisi politikoari irtenbidea aurkitu bitartean, alegia. Behin-behineko Gobernua litzateke, beraz. Egungo Gobernuak, halaber, botere administratiboa baino ez du, hau da, ezin du erabaki politikorik hartu baldin eta larrialdiko egoera sortzen ez bada behintzat. Azken batean, Italian agintea hutsik gera ez dadin ezartzen da «erreserba» formula protokolaria.

Hala ere, gobernu berria osatzeko edo krisi politikoari irtenbidea aurkitzeko bi bide daude: hauteskundeetara deitzea edo egungo alderdi parlamentarioen artean kontsultak egin ostean, beste gobernu bat osatzea. Bigarren honen barruan bi aukera dira: Berlusconni berriz gobernu zuzentzen jartzea edo beste gobernu koalizio bat sortzea.

Berlusconi (Forza Italia) eta beronen aliatuak (Aliantza Nazionalea neofaxista eta Alderdi Kristau Demokratikoa) hauteskundeak aurreratzearen aldekoak dira; alegia, krisiari irtenbidea aurkitzeko bide bakarra hauteskundeak egitea da.

Lega Nord (Umberto Bossi) eta oposizioa, berriz, ez dira horren aldekoak. Ez dute egungo Parlamentua desegin eta hauteskundeak egiterik nahi. Italiako instituzioetako goi kargu batek edo independente batek zuzenduko lukeen Gobernua nahi dute.



Martxoan izan zuen ametsa amesgaizto bihurtu zaio Berlusconiri abenduan

JONE LARRANAGA / DONOSTIA

Silvio Berlusconi Italiako Lehen ministro bihurtzear zela «amets bat izan dut» azpimarratu zuen orduan enpresari zenak, Martin Luther Kingen hitzak gogora ekarrita. Gobernuan egin dituen zortzi hilabete hauetan, ordea, ametsa amesgaizto bihurtu zaio.

Maiatzaren 10ean osatu zuen Berlusconi Gobernua eta orduantxe hasita krisia lekutu ezinean aritu da lehen ministroa. Forza Italia, Lega Nord eta Aliantza Nazionaleko neofaxistek osatutako Gobernu koalizioak nekez iraun zezakeen iraun duena baino gehiago: Umberto Bossiren alderdiari boto asko kendu zizkion hauteskundeetan Berlusconiren Forza Italiak, eta hura jarri zuen hasiera-hasieratik bere etengabeko erasoan jomugatzat.

Bossiri uztailen egokitu zitzaion lehen ministroa astintzeko aukera onena. Ustelkerian nahastutako politikariak behin-behineko kartzelatik libre utzi zituen «dekretukada» onartu zuen Berlusconi. Sekulako krisia sortu zuen hark eta lehen ministroak erretiratu egin behar izan zuen dekretua.

Datorren urterako aurrekontuena izan zen hurrena. Hauteskunde kanpaina zergak ez zi-

tuela igoko agindu zuenez, aurrekontuak berregokitzeko pentsioak murriztu zituen. Sindikatuak haserre bizian erantzun zioten, greba orokorrerako deia egin zuten eta Erroman milioi bat lagun bildu ziren Berlusconiren kontra. Bossik ere haren kontra egin zuen orduko hartan. Azkenean, amore eman zuen Berlusconi eta adostu egin zen sindi-

katuekin.

Baina krisia atzeraezina bihurtu zen Esku Garbiak operazioko fiskalek lehen ministroaren kontrako sumarioa ireki eta, politikarien presioak eraginda, Antonio Di Pietro fiskalak dimittitu egin zuenean. Berlusconi Gobernuari eusteko egindako ahalegin guztiek huts egin zuten harrezkeroztik.


✓ Lega Nord eta oposizioa ez dira hauteskundeak aurreratzearen aldekoak, eta independente batek zuzenduko lukeen Gobernua nahi dute osatu.

SCALFARO ETA KONTSULTAK

Krisiari zer irtenbide aurkitu behar zaion erabakitzen azkena Scalfaro da. Beronek du azken hitza. Hala ere, erabaki bat edo bestea hartu baino lehen kontsultak egiteari ekin dio; izan ere, gaur bertan Giovanni Leone eta Francesco Cossiga lehendakari ohiekin bilduko da. Abenduaren 27an, berriz, Ganbareta lehendakari-kin bilduko da eta gero talde parlamentarioetako ordezkari-ekin. Halaxe adierazi zuen behintzat atzo Gaetano Gifuni Quirinale jauregiko —estatuburuaren egoitza— idazkari nagusiak.

Berlusconi atzo dimisioa aurkeztu ostean, «pisu galanta kendu dut nik gainetik», azpimarratu zuen. «Gorputza eta burua arin sentitzen ditut orain», gaineratu zuen ondoren 58 urte dituen Berlusconi. Orain zazpi hilabete hartu zuen lehen ministro kargua eta maiatzaren 10ean osatu zuen Gobernua honako koalizio honen bidez: Forza Italia (Berlusconi), Lega Nord (Bossi), Aliantza Nazionalea eta Alderdi Demokratiko Demokratikoa.

*Urte Berriak
zorion eta
bakezko
bideetatik
eraman
gaitzala.*



Zorionak



EUSKOTRENBIDEAK

*Que el
Nuevo Año
nos lleve
por caminos
de prosperidad
y paz.*

